

QUICK SILVER



David Hodge "YOUNG QUICK SILVER" ta un di e grandinan den e contestnan di Calypso y Roadmarch.

Na aña 1967 Young Quick Silver a sali Roadmarch King cu su roadmarch THE VILLAGE BURNING DOWN.

Pa esnan cu no conocé, BDA tabatin un combersacion cuné y Quick Silver a conta nos con el a cumenzá y su desarroyo como músico.

"Ta asina cu mi a nace na Aruba; mi a studia y bai school na St. Vincent, Islan Ingles, pasobra mi tata ta di St. Vincent.

Na aña '65 mi a bolbe Aruba pa wak con Aruba tabata, despues di 18 aña. Na aña '66 mi a dicidí di bai haci un sorto di prueba den Calypso Contest. Y e aña ey mi a participá cu Archie y asina nan a wak mi como un di e grandinan di futuro. Archie no a salí e roadmarch mes, pero manera e roadjam el a pega cu te ainda nan ta cant'é. Nan a wak esey como e roadmarch di mas fuerte den tur e añanan ey.

Na aña '67 mi a dicidí di purba atrobe y e mesun aña ey tabatin un candela hopi grandi den Village y mi a canta OH LORD THE VILLAGE BURNIN' DOWN. Esey a

pega como calypso y roadmarch.

Na '68, '69 y '70 mi a gana e calypso y '70 mi a gana calypso y roadmarch."

Tambe Quick Silver a conta nos cu durante e aña ey ela dicidí di bai Hulanda pa wak con cos ta eynan y tambe cu e tabatin un banda cu tabata yama Blue Rythm Combo.

"E banda ey tabata fuerte den calypso y rock steady loke awor nan ta yama reggae. Y tocando esey nos a coi fama den seis luna. Nos tabata e banda di mas popular na Antias. Nos a biaha hopi pa St. Maarten y Corsow. Nos a toca hunto cu e bandanan The Golden Treasures, The Sunbeam, bueno practicamente tur e bandanan bieuw di Corsow."

Segun nos por a comprendé di Quick Silver, despues di tur e éxito cu The Blue Rythm Combo, el a bolbe Hulanda bek na aña 1971.

"Esey tabata e aña cu Lord Boxoe a sali cu su cancion BASHA AWA BAI. Despues di esaki tambe nan a cumenzá hinca papiamento den calypso, dunando e rubianonan cu no por canta calypso manera nos na ingles, e oportunidad pa

participá na e contestnan di calypso."

Quick Silver a keda Hulanda te aña '74 y promé cu mi a bolbe mi a dicidí di competi atrobe. Y na '74 y '75 mi a gana e calypso. Na '74 mi a gan'é cu TELL THEM THEY LIE y na '75 cu I BORN IN ARUBA. Esaki pasobra nan a bisami cu mi ta biba na Hulanda y pakico mi ta bin competi na Aruba. Mi a dicidí di scirbi e cantica aki pa bisa nan cu ta aki mi a nace. Mi ta biba na Hulanda si, pero mi a bai pa mi logra algo."

Despues cu Quick Silver a regresá Hulanda, a pasa algun aña promé cu el a bini bek Aruba, pasobra segun por a comprendé, no tabata vale la pena bini Aruba djis pa participá den e calypso contest pa motibo cu e pasashi tabata mucho caro y si bo no tin sponser bo no ta logra pa bini.

"Na aña '77 a sponser nos un banda y mi a bini Aruba cu The KLM Ringeling pa mi competi hunto cu Lord Tiger, kende a gana na aña '76. Na e ocasion aki mi a sali number

dos, pero mi mester bisa cu e show dimi tabata asina bon cu nan a bisami cu mi mester competi cu profesionalnan y mi a bisa cu no pasobra cu e gainan na Trinidad ta hopi bon. Y ami ta chansa solamente den weekend."

Na aña '78 Quick Silver a bolbe bini Aruba pa participá, aña durante cual el a bolbe conquista e corona.

"Despues mi a dicidí cu ta mihor mi legumai e cos aki pasobra e ta un cos hopi caro y si bo gana mes ta 300 florin so bo ta gana; e no ta vale la pena pa bin solamente pa calypso contest; mi sa bin cu vakantie pero no special pa calypso contest."

Mi a keda sin bin Aruba te cu aña '84 cu mi a bini cu un otro banda 'French Tropical Steel'. Nos a bin cu un total di tres cantante pero nos no a logra nada. Despues mi a dicidí cu mi ta bai stop cu cantamento, pero ora cu mi a bai Hulanda bek un gai hulandes a pidimi pa traha un disco pa nan. Mi a traha un disco pa nan y un die canticanan

a bira hit na New York. Esey tabata Rosie cu a bira un hit grandi na Merca; despues nos a shoot e pa Aruba pa carnaval y akinan tambe el a bende basta hopi.

Na aña '89 mi a bolbe pa competi unda cu mi a sali number y esey tabata e último biaha cu mi a competi te cu aworaki cu mi a bin bek pa haci esaki ya cu bo no por evitá pasobra e cos ta den bo y bo no por lagué cai asina."

Tambe Quick Silver a bisa nos cu no ta pasobra e no tey, e no ta canta mas.

"Mi ta cantando na Europa, casi tur luna of Alemania of Inglatera. Tambe mi ta canta den e festival di Mallorca na Spaña y Dia di La Reina mi ta bai Sint Maarten pa dos show grandi y eynan mi ta canta hunto cu Arrow; na Juni nos ta den e festival grandi na Francia hunto cu Kassav, Krosfayah, y otronan mas, pues e ta un festival hopi grandi. Mi a presentá mi reciente CD na Francia y nan a hañ'é asina bon cu nan a bisami cu ta algo asina nan tin



mester di dje eynan. Augustus nos ta bai Inglaterra pa carnaval tres día y despues nos ta cuminzá traha cantica pa otro año atrobe."

Riba nos pregunta di, con el a mira e desarroyo di calypso y roadmarch durante e ananan cu a transcuri, Quick Silver a bisa nos cu e ta haña cu esaki a cambia hopi.

"Antes nos tabatin pa roadmarch e mes calypso. Calypso a keda mesun cos pasobra e ta slow cu hopi chiste aden. Hopi hende, incluyendomimes, a hisa e tempo un tiki pa asina por balli'é tambe. Y e roadmarch a bira hopi liher."

Tambe nos a puntra Quick Silver kico e lo consehá nos hobennan di awor cu lo kier participá na e contest di calypso y roadmarch.

"Mi ta spera cu nan lo sigui asina. Nan ta bayendo riba un bon caminda y loke ta duel mi ta cu e sponsernan no ta trata nan manera nan a trata nos. Esey kiermen cu den futuro mester trata e hobennan pasobra ta nan ta e integrantenan di futuro y si bo trata nan asina nan ta fada liher y asina tur cos ta daña. Mi ta spera cu e

comerciantenan lo trata nan manera nan a trata nos. Pues, si nan tin mester di sponser duna nan esaki y tambe e arreglistanan pa no cobra nan hopi ya cu tin hopi di nan cu no tin e placa pa haci esaki."

Nafinal Quick Silver a gradici tur esnan cu a bai apoy'é durante e contest di calypso y roadmarch.

"Mita yama tur hende danki, pasobra ta un di e anochinan cu mi a sintié, pasobra nunca mi a wak asina hopi hende na sportpark. Ora cu mi a subi escenario mi por a wak tur hende, loke antes no tabata e caso."

Pa loke ta trata SAC y ASOMA, mi ta spera cu nan lo siña di nan foutnan pasobra tur año nan tin problema cu otro y nan no por siña asina. Nos mes mester haci asina hopi pa bin special pa carnaval cu ora bo tende sorto di cosnan asina e ta duel mi pasobra bo ta puntra bo mes pakico bo ta bin.

Y pa e público carnavalesco, mi ta spera cu nan lo jump y goza; tene carnaval limpi sin droga y na un manera sano.

Mi ta deseá cu tur hende lo pasa un carnaval hopi dushi mes y cu nos lo jump cu nan."

REYNAN DI CALYPSO DESDE 1964

1. Paul Connor	1964/1965
2. King Poncho	1966
3. Young Quick Silver	1967/1968/1969/1970/1974/1975/1978
4. Lord Boxoe (R.I.P.)	1971/1972/1973/1979/1986
5. Lord Tiger	1976/1977
6. Mighty Reds	1980/1981/1982
7. Mighty Talent	1983/84/85/87/88/88/89/90/91/93/95/96/97/98/99
8. Tatoo	1992
9. Singing J.	1994

REYNAN DI ROADMARCH DESDE 1965

1. Paul Connor	1965
2. King Poncho	1966
3. Young Quick Silver	1967/1970
4. Ray Anthony Thomas (R.I.P.)	1968/1969/1974
5. Lord Boxoe (R.I.P.)	1971/72/73/75/76/78/79/83
6. Lord Tito (R.I.P.)	1977
7. Mighty Reds	1980
8. Rastalinda	1981
9. Mighty Cliffy	1982/1985/1987
10. Mighty Talent	1984/89/90/92/93/95/96/97/99
11. King John	1986
12. Long Roy	1988/1998
13. Tatoo	1991
14. King Computer	1994

TITULO DI ROADMARCHNAN

1965 1	PORK FOR SALE	PAUL CONNOR
1966 2	PUT A TIGER IN YOUR TANK	KING PONCHO
1967 3	THE VILLAGE BUTNING DOWN	YOUNG QUICK SILVER
1968 4	BURN UP THE MOMO	RAY ANTHONY THOMAS (R.I.P.)
1969 5	SHE PA NAM PANAM	"
1970 6	STRONG MAN	YOUNG QUICK SILVER
1971 7	BASHA AWA BAI	LORD BOXOE (R.I.P.)
1972 8	PUSSY DON'T KILL ME	"
1973 9	HARAGAN TA DEN BO CAS	"
1974 10	DING DONG	RAY ANTHONY THOMAS (R.I.P.)
1975 11	POND NOLLY POND	LORD BOXOE (R.I.P.)
1976 12	BURY THE COCK	"
1977 13	KING KONG	LORD TITO (R.I.P.)
1978 14	THE MEATY	LORD BOXOE (R.I.P.)
1979 15	COMING DOWN FOR KING	"
1980 16	JUMPING CARNAVAL	MIGHTY REDS
1981 17	HAIL I	RASLINDA
1982 18	JAMMIM	LORD CLIFFY
1983 19	GE-GE	LORD BOXOE (R.I.P.)
1984 20	30 YEARS FALL DOWN	MIGHTY TALENT
1985 21	ROAD ON FIRE	MIGHTY CLIFFY
1986 22	MOVING THE HIPS	KING JOHN
1987 23	PUSH IT	MIGHTY TALENT
1988 24	MORE FOR 34	LONG ROY
1989 25	CARNAVAL COME AGAIN	MIGHTY TALENT
1990 26	DEDE IN CARNAVAL	MIGHTY TALENT
1991 27	SLIDE AND DUCK	TATTOO
1992 28	EVERYBODY SCRATCHING	MIGHTY TALENT
1993 29	THROWING WATER	MIGHTY TALENT
1994 30	ALL THE WAY	KING COMPUTER
1995 31	PUSH UP OUR CULTURA	MIGHTY TALENT
1996 32	JOUVERT MORNING SANDWICH	MIGHTY TALENT
1997 33	POCKET BASHI	MIGHTY TALENT
1998 34	BULL JAM	LONG ROY
1999 35	WAVE IT	MIGHTY TALENT